

मार्निंग डोगरी न्यूज़ बुलेटिन, सभें. 09-20 Hrs

<><><><><><>

Headlines

- प्रधानमंत्री नरेन्द्र मोदी होर अज्ज पैहले पैहले “युग्म” सम्मेलन दा उद्घाटन करगन।
- जम्मू कश्मीर विधानसभा नै पहलगाम आतंकी हमले दी सख्त निंदेया करदे होई प्रस्ताह पास कीता ऐ। उमर अब्दुल्ला होरें आखेआ जे एह हमला लोकें पर नेई, भारत दी आत्मा पर हमला ऐ।
- पाकिस्तान नै जम्मू कुपवाड़ा ते बaramulla जिलें च नियंत्रण रेखा पर गोलीबारी कीती। भारतीय फौज नै पूरी तगड़ेयाई कन्नै बनकाइयै परता दित्ता।
- जम्मू कश्मीर पुलसै डोडा जिले च पाकिस्तान आधारित आतंकवादिएं दे घरें च छापेमारी कीती ऐ।
- अज्ज जम्मू च बी भगवान श्री परशुराम जयंति बड़े मते उत्साह ते जोश कन्नै मनाई जा’रदी ऐ।

<><><><><><>

PM-YUGM

प्रधानमंत्री नरेन्द्र मोदी होर अज्ज नमीं दिल्ली दे भारत मंडपम च युग्म सम्मेलन च हिस्सा लैंगन। संस्कृत भाषा च “युग्म” शब्द दा मतलब होंदा ऐ इक्कमिक्क होना, जोड़ना जां संगमत` इस नां कन्नै आयोजित कीता जा’रदा एह सम्मेलन अपनी किस्मै दा पैहला ऐसा आयोजन ऐ जेहदे च दुनिया भरै थमां सरकारै शैक्षणि क्षेत्र, उद्योग जगत ते नवाचार सरबन्धी क्षेत्र कन्नै जुड़े दे नेता हिस्सा लैने लेई आए दे न। बाधवानी फाउंडेशन ते सरकार दे संस्थाने दे कोई 1 जहार 400 करोड़ रपे दे सांझे सैहयागे आली परियोजना तैहत लोआया जा’रदा, एह सम्मेलन भारत दी नवाचार यात्रा च इक महत्वपूर्ण भूमिका निभाग। एह सम्मेलन मुख्य तौरा पर चर्चा, आत्मनिर्भर ते नमिएं काहडें कन्नै चलने आलें पर केन्द्रित रौहग। जिन्ने 2047 तगर इस विकसित राष्ट्र बनने दा धेइया कीते दा ऐ।

<><><><><><>

JK Assembly

जम्मू कश्मीर विधानसभा नै पहलगाम आतंकी हमले दी सख्ती नै निंदेया करदे होई इक प्रस्ताह पास कीता ऐ। पिछले हफ्ते होए दे इस जालिमाना आतंकी हमले पर चर्चा लेई लोआए गेदे जम्मू कश्मीर विधानसभा दे इक दिने दे विशेष इजलास दरान एह प्रस्ताह पास कीता गेआ जेह्दे च आतंकवादिएं दी इस हरकत गी सख्त लफ्जें च जालमाना, गैर कनूनी ते बुजदलाना करार दित्ता गेआ। सदन नै आखेआ जे इस चाल्ली दियां हरकतां जम्मू कश्मीर दे दिल, साढ़िएं संवैधानिक कदरें ते एकता दी भावना गी ढेह पुज्जियां न। हमले च मारे गेदे लोकें ते उंदे परोआर आलें कन्नै हमदर्दी प्रगट करदे होई विधानसभा नै सैयद आदित हुसैन शाह दी दलेरी दा चेचे तौरा पर जिक्र कीता ते आतंकवाद खलाफ केन्द्र सरकार आस्सेआ कीती जा'रदी कूटनीतिक कारवाइएं दा बी समर्थन कीता। इस मौके विधानसभा दे सब्बने मिंबरें इऊं मिंटे दा मौन रखियै पहलगाम हमले च मारे गेदे लोकें दी आत्मा दी शांति लेइ प्रार्थना बी कीती।

<><><><><><>

CM-LA

मुख्यमंत्री उमर अब्दुल्ला होरें कल जम्मू कश्मीर विधानसभा दे विशेष इजलास गी संबोधत करदे होई आखेआ ऐ जे पहलगाम आतंकी हमला शड़ा लोकें पर हमला नेई सगुआं भारत दी आत्मा पर हमला ऐ। उनें आखेआ जे विधानसभा दे इक7इक मिंबर गी गैहरा दुख ते सदमा लगा ऐ जेह्दे नै जम्मू कश्मीर च पिच्छे होई दिएं ऐसिएं घटनाएं—वारदातें ते जुल्में ज्यादातिएं दे चेते बी ताजा होई गे न। उनें जम्मू कश्मीर दे लोकें दी तरफा बी हमले दे बाद दस्सी गेदी इक जुटता, हमदर्दी, हिम्मत ते दलेरी दी बी सराहना कीती।

<><><><><><>

LoC Firing

जम्मू कश्मीर दे कुपवाड़ा, बारामुला जिले ते जम्मू जिले दे अखनूर सेक्टर च बी पाकिस्तानी फौज नै बन्ने पारा बिजन उक्सावे दे गोलीबारी कीती ऐ। रक्षा प्रवक्ता नै जानकारी दित्ती ऐ जे 28 ते 29 अप्रैल दी मझाटली रातीं कीती गेदी, पाकिस्तानी फौज दी इस हरकत दा भारतीय फौज नै पूरी तगड़ेयाई कन्नै शैल बनकाइयै परता दित्ता। उनें दस्सेआ जे पूरी नियंत्रण रेखा पर फौज नै हालात पर नेड़मी तकक रखी दी ऐ ते बन्ने कन्नै लगदे संवेदनशील इलाकें च कुसै बी चाल्ली दे चतरे कन्ने निबड़ने लेई पूरी चाल्ली तैआर ऐ। उनें दस्सेआ जे कल्लै आलिएं कारवाइएं च कुसै दे मारे जाने जां घायल होने दी जानकारी नेई ऐ।

<><><><><><>

School Mock Drill(byte)

पहलगाम आतंकी हमले मगरा बधदे तनाह दे चलदे पुंछ जिले च नियंत्रण रेखा दे कोल कश दे स्कूलें च बचाह आले हीलें लैने शुरू कीते गे। अधिकारिएं कुसै बी चाल्ली दे हालात बनने पर ओहदा सामना करने आले उत्थूं दे विद्यार्थिएं ते अमले गी अभ्यास करोआया। एह्दे अलावा बंकरें दी साफ सफाई ते उनेंगी परतियै बनाने दी प्रक्रिया बी सुरक्षा लेई कीती जा'रदी ऐ। प्रशासन नै हालातें दी बरीकी कन्नै निगरानी करदे होई उत्थुं दे बसनीकिएं ते शिक्षा संस्थानें गी सावधान रौहने आस्तै ते सुरक्षा नियम बरतने आस्तै आखेआ।

<><><><><><>

Doda Raids

आतंकी ढांचे ते आतंकवादिएं दे मददगारें खलाफ सख्त कारवाई करदे होई जम्मू कश्मीर पुलस डोडा जिले च पाकिस्तान आधारित 13 आतंकवादिएं दे घरें पर छापे मारे न। साढ़े संवाददाता नै जानकारी दित्ती ऐ जे इस चाल्ली दिएयां कारवाइयां ते छापेमारी पहलगाम आतंकी हमले दे बाद तेज करी दित्तियां गेदियां जिंदा मकसद मकामी लोकें आस्सेआ बन्ने पारा आतंकवादी कारवाइएं च कुसै बी चाल्ली दे सैहयोग दी गुंजेश गी खत्म करना ऐ तां जे बन्ने पारा कुसै बी चाल्ली दी साजश गी रोकेआ जाई सकै। उआं अजें तोड़ी इस सरबंधे च कुसै दी गिरफ्तारी नेई होई ऐ।

<><><><><><>

Parshuram Jayanti

अज्ज पूरे जम्मू च परशुराम जयंति बड़े गै धार्मिक ते उत्साह कन्ने मनाई जा'रदी ऐ। इस दिन भगवान श्री परशुराम जिनेंगी विष्णु भगवान जी दा 6मां अवतार मन्नेआ जंदा ऐ, उंदा जन्म होआ हा। भगवान परशुराम जी, जिनेंगी ब्राह्मणें दा योद्धा मन्नेआ जंदा ऐ, उनेंगी उंदी बहादुरी, अनत्रुट्ट लगन ते धर्म दे बत्ते उप्पर चलने दी वचनबद्धता आस्तै चेता कीता जंदा ऐ। इस ध्याड़े गी पूरे जम्मू खित्ते च ध्यारें दे रूपै च मनाया जंदा ऐ। इस मौके पर इक आकर्षित शोभा यात्रा दा बी आयोजन कीता गेआ जेह्दे च मते सारे लोकें झंडे फगड़ियै हिस्सा लैता ते “परशुराम जी दी जय” दे नारे लाए।

<><><><><><>

DC Kishtwar

किश्तवाड़ दे डिप्टी कमीशनर राजेश कुमार शवन होरें मड़वाह दे दूर दरेड़े इलाकें वारवन च जल संपर्क कार्यक्रम दे हेठ पब्लिक दरबार करोआग। इस पैहलकदमी दा मकसद उत्थूं दे मकामी लोकें कन्नै मलाटी करना ते उंदी परेशानिएं दा पता जाना हा। गल्लबात दे दरान मकामी लोकें बड़े सारे मसलें जिंदे च शिड़क संपर्क, सेहत सरबंधी, शिक्षा सरबंधी ते होर बी शामिल हे, उंदे बारे डिप्टी कमीशनर हुंदे कन्नै गल्लबात कीती, जेह्दे मगरा डिप्टी कमीशनर होरें उनेंगी तौले शा तौले इनें परेशानिएं गी नबेड़ने दा आश्वासन दित्ता ते प्रशासन दे समावेशी विकास दी वचनबद्धता बारे बी जिक्र कीता।

<><><><><><>

Weather

मौसम विभाग नै जम्मू कश्मीर च औंदे किश दिनें तगर मौसम खुश्क बने दा रौहने ते मदानी इलाकें च केई थाहरें लूह चलने दी शेंका जताई ऐ। पैहली मई तगर मौसम भलेया खुश्क ते 2 ते 3 मई गी किश थाहरें पर हल्की बरखा बरने दे आयार न। लोकें गी सलाह दित्ती जंदा ऐ जे ओह धुप्पै च बाहर नेई निकलन, खुल्ला पानी पीन, हल्के सूती कपड़े पान ते जरूरी एहतियात बरतन। तोआई श्रीनगर राष्ट्रीय जरनैली शिड़के पर गडिङएं दी आओजाई ब्हाल होई चुकी दी ऐ।

<><><><><><>